

საინფორმაციო ფურცელი - შეთავაზება PAR/C-001/25

1. მზღვეველი: სააქციო საზოგადოება - სს «სადაზღვევო კომპანია ალდაგი»;
2. დაზღვევის ხელშეკრულების სახე: მესამე პირის (პირთა) წინაშე წარმოქმნილი პასუხისმგებლობისა და მგზავრის უბედური შემთხვევის დაზღვევა პარაპლანებისთვის
3. დაზღვეული რისკის აღწერილობა/სადაზღვევო დაფარვის პირობები:
დაზღვევის ხელშეკრულების საგანია **დამზღვევის** კანონიერ სარგებლობაში არსებული პარაპლანის დაზღვევა **მზღვეველის** მიერ წინამდებარე ხელშეკრულების პირობების შესაბამისად, **დამზღვევის** მიერ შესაბამისი სადაზღვევო პრემიის გადახდის საფუძველზე, შემდეგი სადაზღვევო რისკებისაგან (სადაზღვევო დაფარვები):
 - I. მესამე პირის (პირთა) წინაშე წარმოქმნილი პასუხისმგებლობა (ერთადგილიანი პარაპლანი/არაკომერციული დანიშნულების მქონე ორადგილიანი პარაპლანი)
 - II. მესამე პირის (პირთა) წინაშე წარმოქმნილი პასუხისმგებლობა და მგზავრის უბედური შემთხვევის დაზღვევა (კომერციული დანიშნულების მქონე ორადგილიანი პარაპლანი)
4. დამზღვევის მიერ სადაზღვევო პრემიის გარდა სხვა ფინანსური ხარჯის გაწევის წინაპირობები, ოდენობა და წესი - არ არის გათვალისწინებული
5. ფრანშიზის სახე, ოდენობა და გამოყენების წინაპირობები
ფრანშიზა არის თანხა, რომელიც არ ექვემდებარება **მზღვეველის** მიერ ანაზღაურებას და რომელიც აკლდება ზარალის თანხის ოდენობას და რომელზეც **მზღვეველი** არ არის პასუხისმგებელი.
ფრანშიზა - ასეთის არსებობის შემთხვევაში - განისაზღვრება სადაზღვევო პოლისში.
ფრანშიზა შეიძლება იყოს:
პირობითი - თანხობრივად გამოხატული პირობითი ზღვარი. თუ ზარალი ამ პირობით ზღვარზე ნაკლებია ან მისი ტოლია, **მზღვეველი** მას არ აანაზღაურებს. თუ ზარალი აღემატება ამ პირობით ზღვარს, **მზღვეველი** აანაზღაურებს ზარალის მთლიან ოდენობას;
უპირობო - ის მინიმალური თანხა, რომელიც ყოველთვის გამოაკლდება მთლიანი ზარალის ოდენობას;
თუ **პოლისში** **ფრანშიზის** ტიპი არ არის მითითებული, გამოიყენება **უპირობო ფრანშიზა**;
ფრანშიზა შესაძლოა განისაზღვროს როგორც ყველა, ისე ცალკეული სახის ზიანისათვის სხვადასხვა მოცულობით და მიეთითოს პოლისში.

6. დაზღვევის ხელშეკრულების საგამონაკლისო პირობები

6.1. საერთო გამონაკლისები

ქვემოთ მოცემული გამონაკლისები ძალაშია ყველა ზემოთ განსაზღვრული (ნაწილი I, II,) სადაზღვევო დაფარვისათვის და მზღვეველი არ არის პასუხისმგებელი:

6.1.1 შემთხვევაზე, რომლის დადგომის დროს დაზღვეული პარაპლანი არ გამოიყენებოდა იმ მიზნით, რომელიც მითითებულია პოლისში;

6.1.2. შემთხვევებზე, რომლებიც პარაპლანის ფრენისთვის სავალდებულო აღჭურვილობის არავარგისიანობამ ან არასერტიფიცირებული საფრენი აღჭურვილობით განხორციელებულმა ფრენამ გამოიწვია;

6.1.3. შემთხვევებზე, რომლებიც პარაპლანით კომერციული ფრენისას არასერტიფიცირებულ, საფრენად არავარგის ლოკაციაზე ფრენის განხორციელებამ გამოიწვია;

6.1.4. შემთხვევებზე, როდესაც არაკომერციული ფრენის შესრულებისას, ფრენა არ განხორციელდა მხოლოდ შესაბამის გამოყოფილ საჰაერო სივრცეში და პარაპლანით ფრენების წარმოების, ექსპლუატაციის, უსაფრთხოებისა და ამ წესით განსაზღვრული საქმიანობისთვის დადგენილი კანონის შესაბამისად;

6.1.5. შემთხვევებზე, რომლებიც პარაპლანით ფრენების წარმოების, ექსპლუატაციის, უსაფრთხოებისა და ამ წესით განსაზღვრული საქმიანობისთვის დადგენილი კანონით გათვალისწინებული ნებისმიერი წესის დარღვევამ გამოიწვია;

6.1.6. წინამდებარე ხელშეკრულებასა და სადაზღვევო პოლისში აღნიშნულის გარდა რომელიმე სხვა რისკზე;

6.1.7. იმ ქონებისათვის მიყენებულ ზიანზე, რომელიც წარმოადგენს დაზღვეული პირის საკუთრებას;

6.1.8. შემთხვევაზე დაზღვეული პარაპლანის მართვისას არაუფლებამოსილი პირის მიერ;

6.1.9. შემთხვევაზე, რომელიც მოხდა უფლებამოსილი მფრინავის ალკოჰოლური ან ნარკოტიკული (ფსიქოტროპული) ნივთიერებების ზემოქმედების ქვეშ ყოფნის დროს (მიუხედავად იმისა, ზარალი დაზღვეული პარაპლანის უფლებამოსილი მფრინავის მიზეზით/ბრალით დადგა, თუ არა);

6.1.10. დამზღვევის ან მისი წარმომადგენლის განზრახ ან სისხლის სამართლის კანონმდებლობით განსაზღვრულ მართლსაწინააღმდეგო ქმედებებზე;

6.1.11. გარემოებებზე, რომელიც ზრდის სადაზღვევო რისკის დადგომის ალბათობას, ცნობილია დამზღვევის ან მისი წარმომადგენლისათვის და ამის შესახებ მან დაუყოვნებლივ არ აცნობა მზღვეველს წერილობითი ფორმით ან მზღვეველს მიეწოდა ყალბი ან არასრული ინფორმაცია (დოკუმენტები) აღნიშნულის შესახებ;

6.1.12. შემთხვევებზე, რომლებიც გამოწვეულია:

6.12.1.1. იონიზირებული რადიაციით, ბირთვული ან სხვა სახის მავნე ნარჩენებიდან მიღებული რადიაციით და დაბინძურებით;

6.12.1.2. რადიოაქტიური, ფეთქებადი, ბირთვული ნივთიერების შემცველი აირის ბუნებრივი მდგომარეობის ცვლილებით.

6.1.13. შედეგებზე, რომლებიც პირდაპირ ან არაპირდაპირ გამოწვეულია საომარი მოქმედებებით, დაპყრობით, სამოქალაქო ომით, მიუხედავად იმისა, აღნიშნული მდგომარეობა გამოცხადებულია სახელმწიფო ხელისუფლების მიერ თუ არა, განსაკუთრებული, საგანგებო, სამხედრო მდგომარეობით, მასობრივი არეულობით, აჯანყებით, ლოკაუტით, დიქტატორული რეჟიმით, ადგილობრივი ან სახელმწიფო ხელისუფლების ბრძანების თანახმად საკუთრების საზოგადო მფლობელობაში გადაცემით, კონფისკაციით ან ჩამორთმევით, ტერორიზმით ან მისი ნებისმიერი გამოვლენით და სხვა ანალოგიური მიზეზებით;

6.1.14. შემთხვევებზე, როდესაც დამზღვევი (დაზღვეული) მესამე პირის წინაშე თავის ვალდებულებებს აღიარებს მზღვეველის წერილობითი თანხმობის გარეშე;

6.1.15 მხარეები თანხმდებიან, რომ შემთხვევა, რომლის ასანაზღაურებლად გასაცემი სადაზღვევო ანაზღაურება არ აღემატება 15 000 (თხუთმეტი ათასი) ლარს, განიხილება დამზღვევის მიერ მზღვეველისათვის პარაპლანის ექსლუატაციის თაობაზე საექსპერტო დასკვნის წარდგენის გარეშეც, ხოლო იმ შემთხვევაში თუ სხვა წარმოდგენილი დოკუმენტაციით დგინდება, ამავე დაზღვევის პირობებით დადგენილი სადაზღვევო დაფარვიდან დადგენილი გამონაკლისები ან/და უარის თქმის საფუძველი, სადაზღვევო ანაზღაურება არ გაიცემა.

6.2. ქვემოთ მოცემული გამონაკლისები, ზოგად გამონაკლისებთან ერთად, ძალაშია I სადაზღვევო დაფარვისათვის და მზღვეველი არ არის პასუხისმგებელი:

6.2.1. შემთხვევაზე, როდესაც დაზარალებული წარმოადგენს:

6.2.1.1. პირს, რომელიც უბედური შემთხვევის მომენტში მართავდა დაფარულ პარაპლანს;

6.2.1.2. დაზღვეული პირის (ასევე უფლებამოსილი მფრინავის) ოჯახის წევრს (წინამდებარე დაზღვევის მიზნებისთვის საქართველოს სამოქალაქო კოდექსის პირველი და მეორე რიგის შემკვიდრედ გათვალისწინებული პირები), ასევე, დაზღვეული პარაპლანის მგზავრს;

6.2.1.3. დამზღვევის დაქვემდებარებულს/თანამშრომელს მათ შორის არსებული ხელშეკრულების ძალით;

6.2.2. პასუხისმგებლობაზე, რომელიც წარმოშობილია ნებისმიერი სხვა კონტრაქტის ან შეთანხმების საფუძველზე.

6.3. ქვემოთ მოცემული გამონაკლისები, ზოგად გამონაკლისებთან ერთად, ძალაშია II ნაწილის სადაზღვევო დაფარვისათვის, მზღვეველი არ არის პასუხისმგებელი:

6.3.1. არ ანაზღაურდება მგზავრების ჯანმრთელობის მდგომარეობის გაუარესება/გარდაცვალება, თუ ასეთი შემთხვევა დადგება შემთხვევის მომენტიდან 12 კალენდარული თვის გასვლის შემდეგ.

7. სადაზღვევო ანაზღაურებაზე უარის გაცხადება (ძალაშია ყველა შემთხვევა განსაზღვრული (ნაწილი I, II) სადაზღვევო დაფარვისათვის);

7.1. მზღვეველს შეუძლია უარი განაცხადოს სადაზღვევო ანაზღაურების გაცემაზე იმ შემთხვევაში, თუ ადგილი ჰქონდა შემდეგ შემთხვევებს:

7.1.1. მზღვეველი არ აანაზღაურებს ზარალს დამზღვევის მიერ წინამდებარე პირობებით და შესაბამისი სადაზღვევო პოლისით დადგენილი ვალდებულებების შეუსრულებლობის ან საქართველოს კანონმდებლობით გათვალისწინებულ შემთხვევებში;

7.1.2. იმ შემთხვევაში, თუ დაზღვეულსა და დაზარალებულს შორის მიმდინარეობს დავა მომხდარ შემთხვევასთან დაკავშირებით - ანაზღაურების გაცემის საფუძველია სასამართლოს კანონიერ ძალაში შესული გადაწყვეტილება, რომელიც ადასტურებს დამზღვევის პასუხისმგებლობის დადგომას მესამე პირთათვის მიყენებული ზიანის ანაზღაურებაზე, ამასთან, ანაზღაურების გაცემის საფუძველი არ არის ისეთი შემთხვევები, როდესაც მიღებული იქნება დაუსწრებელი გადაწყვეტილება ან დამზღვევი საქმის სასამართლო განხილვის ეტაპზე თავად ცნობს სარჩელს ან მის ნაწილს მზღვეველთან წინასწარი წერილობითი შეთანხმების გარეშე;

7.1.3 დამზღვევმა არ მიაწოდა მზღვეველს სადაზღვევო შემთხვევის შესახებ ინფორმაცია (შეტყობინება) იმ ვადებში, რომელიც შეთანხმებულია პოლისითა და წინამდებარე პირობებით და აღნიშნული შეუტყობინებლობით არსებითად შეილახა მზღვეველის ინტერესები;

7.1.4 დამზღვევის მიერ ზიანზე პასუხისმგებელი პირისათვის უარის თქმა პრეტენზიებზე ან იმ უფლებებზე, რომელიც უზრუნველყოფს მის მიმართ მოთხოვნების რეალიზაციას, აგრეთვე უარის თქმა მზღვეველისათვის, გადასცეს ამ უკანასკნელს ზიანის ანაზღაურების მოთხოვნის წასაყენებლად საჭირო დოკუმენტები, ათავისუფლებს მზღვეველს სადაზღვევო ანაზღაურების გადახდისაგან, ხოლო თუ ასეთი ანაზღაურება უკვე გაცემულია, მზღვეველს ანიჭებს გაცემული თანხის უკან მოთხოვნის უფლებამოსილებას;

7.1.5. შესაბამისი სადაზღვევო პოლისით გათვალისწინებული პირველი ან ერთჯერადი სადაზღვევო პრემიის დამზღვევის მიერ გადახდამდე, ხოლო თუ სადაზღვევო პოლისი მრავალწლიანია, როგორც პირველი, ისე ყოველი მომდევნო წლის პირველი ან ერთჯერადი სადაზღვევო პრემიის გადახდამდე მზღვეველი თავისუფალია ნაკისრი მოვალეობის შესრულებისაგან;

7.1.6. დამზღვევის მიერ სადაზღვევო პრემიის დროულად, სადაზღვევო პოლისით დადგენილ ვადებში გადაუხდელობის შემთხვევაში, მზღვეველის მხრიდან განისაზღვრება პრემიის გადახდის ორკვირიანი დამატებითი ვადა. თუ ამ ვადის გასვლის შემდგომ ადგილი ექნება სადაზღვევო შემთხვევას და გადახდა არ იქნება განხორციელებული, მზღვეველი თავისუფლდება ანაზღაურების მოვალეობისაგან. ამასთან, პრემიის დროულად გადაუხდელობისას მზღვეველი უფლებას იტოვებს, ერთი თვით ადრე, წერილობითი შეტყობინების საფუძველზე და ამ ვადის უმედეგოდ გასვლის შემდეგ, ცალმხრივად შეწყვიტოს დაზღვევის ხელშეკრულება;

7.1.7. ერთი შემთხვევით გამოწვეული დანაკარგი განხილული იქნება ერთ სადაზღვევო შემთხვევად. არავის აქვს უფლება, ორჯერ მიიღოს ანაზღაურება წინამდებარე დაზღვევის თანახმად, ერთი და იმავე ზიანისათვის ან ზიანის რომელიმე ელემენტისათვის.

8. სადაზღვევო შემთხვევის დადგომისას მზღვეველისათვის შეტყობინების გაგზავნის, მოთხოვნის წარდგენის, სადაზღვევო შემთხვევის რეგულირებისა და სადაზღვევო ანაზღაურების გაცემის ფორმა და ვადები:

8.1. სადაზღვევო შემთხვევის დადგომისას დამზღვევი ვალდებულია:

8.1.1. დაუყოვნებლივ, მაგრამ არაუგვიანეს 24 საათისა, აცნობოს ამის შესახებ მზღვეველის ქოლ ცენტრს სადაზღვევო პოლისში მითითებულ ნომერზე, ხოლო 2 (ორი) სამუშაო დღის განმავლობაში წერილობითი ფორმით გაუგზავნოს მზღვეველს შეტყობინება სადაზღვევო შემთხვევის შესახებ;

8.1.2. მზღვეველის წარმომადგენლის მისვლამდე უზრუნველყოს სადაზღვევო შემთხვევის ადგილზე არსებული მდგომარეობის შენარჩუნება ობიექტური შესაძლებლობისა და მოქალაქეობრივი უფლებამოსილების ფარგლებში, გარდა იმ შემთხვევისა, როდესაც აღნიშნულის საწინააღმდეგო მითითება გაიცემა მზღვეველის მიერ და მზღვეველი მხოლოდ ზეპირი/სატელეფონო ინსტრუქტაჟით შემოიფარგლება;

8.1.3. გაუწიოს მზღვეველს სათანადო დახმარება, ხელი შეუწყოს, მიიღოს მონაწილეობა სადაზღვევო შემთხვევის გამომწვევი მიზეზების, მისი დადგომის გარემოებების, შედეგებისა და მიყენებული ზიანის სიდიდის სრულ და ობიექტურ გამოკვლევაში, დადგენასა და შეფასებაში და არ იმოქმედოს მზღვეველის ინტერესების საწინააღმდეგოდ;

8.1.4. დაუყოვნებლივ შეატყობინოს მზღვეველს სადაზღვევო შემთხვევასთან დაკავშირებით მის მიერ მიღებული ნებისმიერი უწყების, შეტყობინების ან გზავნილის შესახებ;

8.1.5. საკუთარი უფლებამოსილებისა და შესაძლებლობის ფარგლებში ხელი შეუწყოს მზღვეველს სუბროგაციის უფლების გამოყენებაში;

8.1.6. დაუყოვნებლივ აცნობოს მზღვეველს სავარაუდო სადაზღვევო შემთხვევასთან დაკავშირებით მის წინააღმდეგ აღძრული ნებისმიერი სარჩელის თაობაზე და იურიდიულ პროცედურებზე, აგრეთვე, გაცხადებულ ნებისმიერ პრეტენზიაზე;

8.1.7. ზედმინევით დაიცვას წინამდებარე ხელშეკრულების ყველა დებულების მოთხოვნა და მიაწოდოს მზღვეველს ყველა საჭირო და შესაბამისი ინფორმაცია და დოკუმენტაცია, რომელიც, თავის მხრივ, წარმოადგენს სადაზღვევო ანაზღაურების გაცემის საფუძველს;

8.1.8. სადაზღვევო შემთხვევის დადგომისას წარუდგინოს მზღვეველს ქვემოთ ჩამოთვლილი დოკუმენტაცია:

8.1.8.1. განცხადება სადაზღვევო შემთხვევის შესახებ, შემდეგი წესის შესაბამისად-სადაზღვევო შემთხვევის დადგომიდან დაუყოვნებლივ, მაგრამ არაუგვიანეს 24 საათისა, აცნობოს ამის შესახებ მზღვეველის ქოლ ცენტრს სადაზღვევო პოლისში მითითებულ ნომერზე, ხოლო 2 (ორი) სამუშაო დღის განმავლობაში წერილობითი ფორმით გაუგზავნოს მზღვეველს შეტყობინება სადაზღვევო შემთხვევის შესახებ;

8.1.8.2. სადაზღვევო პოლისის ორიგინალი (სადაზღვევო პერიოდში პოლისის დაკარგვის შემთხვევაში, დამზღვევის წერილობითი განცხადების საფუძველზე გაიცემა პოლისის დუბლიკატი, ხოლო დაკარგული პოლისი ძალადაკარგულად ითვლება და მის საფუძველზე წარმოდგენილი მოთხოვნები ანაზღაურებას არ ექვემდებარება), ხოლო თუ პოლისი გაცემულია ელექტრონულად, მხოლოდ მისი ელექტრონული ფორმა;

8.1.8.3. შესაბამისი უფლებამოსილი ორგანოების მიერ ოფიციალური ფორმით გაცემული (დამოწმებული უფლებამოსილი პირის ბეჭდითა და ხელმოწერით) სადაზღვევო შემთხვევის დამადასტურებელი დოკუმენტი;

8.1.8.4. ფრენის აღრიცხვის ფორმა;

8.1.8.5. კომერციული ფრენებისას მგზავრის საინფორმაციო თანხმობის ბარათი;

8.1.8.6. პარაპლანის სარეგისტრაციო მოწმობის ასლი;

8.1.8.7. მფრინავის კომპეტენციის დამადასტურებელი დოკუმენტის ასლი;

8.1.8.8. მფრინავის სიფხიზლის ცნობა;

8.1.8.9. მოსარგებლის საიდენტიფიკაციო დოკუმენტები;

8.1.8.10. შეტყობინება დაზარალებული მესამე პირის (პირების) მიერ პრეტენზიის წაყენების შესახებ;

8.1.8.11. დოკუმენტები სამედიცინო დაწესებულებიდან, რომელთა საფუძველზეც შესაძლებელია დაზარალებულთა ჯანმრთელობის მდგომარეობაზე კომპეტენტური

ექსპერტიზის ჩატარება და საექსპერტო დასკვნის გაკეთება (საავადმყოფო ფურცლის ასლი, ცნობა მკურნალობის შესახებ, საექსპერტო კომისიის დასკვნა და სხვა);

8.1.8.12. თუ მგზავრის გარდაცვალების გამო ან სხვა მიზეზთა გათვალისწინებით, სხვა პირი იღებს სადაზღვევო ანაზღაურებას, დოკუმენტი, რომელიც ადასტურებს მოსარგებლის მიერ სადაზღვევო ანაზღაურების მიღების უფლებამოსილებას, გარდაცვალების შემთხვევაში, ასეთი დოკუმენტია სამკვიდრო მოწმობა, რომელიც განსაზღვრავს მემკვიდრის წილს მამკვიდრებლის სამკვიდროში.

იმ შემთხვევაში, თუ დაზღვეულსა და დაზარალებულს შორის მიმდინარეობს დავა მომხდარ შემთხვევასთან დაკავშირებით - ანაზღაურების გაცემის საფუძველია სასამართლოს კანონიერ ძალაში შესული გადაწყვეტილება, რომელიც ადასტურებს დამზღვევის პასუხისმგებლობის დადგომას მესამე პირთათვის მიყენებული ზიანის ანაზღაურებაზე, ამასთან, ანაზღაურების გაცემის საფუძველი არ არის ისეთი შემთხვევები, როდესაც მიღებული იქნება დაუსწრებელი გადაწყვეტილება ან დამზღვევი საქმის სასამართლო განხილვის ეტაპზე თავად ცნობს სარჩელს ან მის ნაწილს მზღვეველთან წინასწარი წერილობითი შეთანხმების გარეშე.

8.1.9. სადაზღვევო შემთხვევის დადგომისას დაუყოვნებლივ აცნობოს აღნიშნულის შესახებ შესაბამის სამართალდამცავ ორგანოებს;

8.1.10. შემთხვევის დადგომის შემდეგ მიაწოდოს მზღვეველს წინამდებარე ხელშეკრულებით გათვალისწინებული ყველა ის ინფორმაცია და დოკუმენტაცია, რომელსაც მზღვეველი მიიჩნევს საჭიროდ სადაზღვევო შემთხვევის ობიექტურად შეფასებისათვის;

8.1.11. მისცეს შესაძლებლობა მზღვეველს სრული კონტროლი გაუწიოს დამზღვევის მიმართ მესამე პირთა პრეტენზიის დარეგულირებისთვის საჭირო კანონით გათვალისწინებულ ყველა სახის პროცედურას;

8.1.12. მისცეს მზღვეველს შესაძლებლობა მონაწილეობა მიიღოს მესამე პირის დაზიანებული ან განადგურებული ქონების დათვალიერებასა და ფოტოგადაღებებში.

8.3. სადაზღვევო შემთხვევის აქტი და სადაზღვევო ანაზღაურების გაცემა

8.3.1. მზღვეველის მიერ მოთხოვნილი, ზიანის ანაზღაურების მიზნებისთვის ყველა დოკუმენტაციის (მათ შორის, ზარალის შეფასების აქტი (ხარჯთაღრიცხვა)) მიღების შემდეგ, არაუგვიანეს 30 კალენდარული დღის ვადაში, დგება სადაზღვევო შემთხვევის აქტი ან დამზღვევს ეცნობება დასაბუთებული უარი სადაზღვევო ანაზღაურების გაცემაზე. სადაზღვევო შემთხვევის აქტი წარმოადგენს მზღვეველის მიერ სადაზღვევო ანაზღაურების გაცემის საფუძველს და რომელზეც ხელს აწერს ორივე მხარე (მზღვეველი და დამზღვევი/მოსარგებლე). სადაზღვევო აქტზე ხელმოწერით მხარეები თანხმდებიან სადაზღვევო ანაზღაურების საბოლოო მოცულობაზე და სხვა გარემოებებზე, რის შემდეგაც 3 (სამი) სამუშაო დღის ვადაში (გარდა იმ შემთხვევებისა, როდესაც ხელშეკრულებით გათვალისწინებულია შესაბამისი ვადა ან პირობა კონკრეტული შემთხვევისათვის) ანაზღაურდება თანხა დამზღვევის (მოსარგებლის) სასარგებლოდ სადაზღვევო შემთხვევის აქტში მითითებულ საბანკო ანგარიშებზე.

8.3.2. თუ ამ ხელშეკრულებით გათვალისწინებული დაფარვის ფარგლებში დამზღვევსა (დაზღვეულს) და დაზარალებულს შორის მიმდინარეობს დავა მომხდარი შემთხვევის

გამო, მზღვეველი ანაზღაურებს ზარალს კანონიერ ძალაში შესული სასამართლო გადაწყვეტილების (დაზღვეულის/უფლებამოსილი მფრინავის მიერ მესამე პირისათვის (პირებისათვის) მიყენებული ზიანის ანაზღაურების თაობაზე) მზღვეველისათვის წარმოდგენიდან 3 (სამი) სამუშაო დღის ვადაში;

8.3.3. მზღვეველი უფლებამოსილია შეადგინოს მესამე პირის დაზიანებული ან განადგურებული ქონების შენაცვლების/აღდგენითი ღირებულების კალკულაცია (ხარჯთაღრიცხვა);

8.3.4. I ნაწილის სადაზღვევო დაფარვის ფარგლებში სადაზღვევო ანაზღაურების გაცემის საფუძველს წარმოადგენს დაზარალებული პირისათვის, კანონიერ ძალაში შესული, სასამართლოს გადაწყვეტილების საფუძველზე გადასახდელი კომპენსაცია, მაგრამ არაუმეტეს დაზღვევის ხელშეკრულებით გათვალისწინებული პირობებისა/თანხებისა;

8.3.5. I ნაწილის სადაზღვევო დაფარვის ფარგლებში სასამართლოს გადაწყვეტილების გარეშე მესამე პირ(ებ)ისათვის მიყენებული ზიანის კომპენსაცია განხორციელდება იმ შემთხვევაში თუ ამგვარი კომპენსაციის ოდენობა წერილობითი გზით შეთანხმებულია მზღვეველთან და თუ დაზარალებული წერილობით დაადასტურებს, რომ აღნიშნული კომპენსაციის მიღების შემდგომ, მას აღარ გააჩნია/გაუჩნდება არავითარი პრეტენზია სადაზღვევო შემთხვევასთან დაკავშირებით;

8.3.6. I ნაწილის სადაზღვევო დაფარვის ფარგლებში ერთი შემთხვევით გამოწვეული დანაკარგი განხილული იქნება ერთ სადაზღვევო შემთხვევად. არავის აქვს უფლება, ორჯერ მიიღოს ანაზღაურება წინამდებარე დაზღვევის თანახმად, ერთი და იმავე ზიანისათვის ან ზიანის რომელიმე ელემენტისათვის;

8.3.7. I ნაწილის სადაზღვევო დაფარვის ფარგლებში მზღვეველი გასცემს სადაზღვევო ანაზღაურებას იმ შემთხვევაში, თუ დაზღვეული პარაპლანის ექსპლუატაციისას მესამე პირის სიცოცხლეს, ჯანმრთელობას და/ან ქონებას მიაღება ზიანი, რის გამოც დადგება დამზღვევის სამოქალაქო პასუხისმგებლობა. ანაზღაურება გაიცემა იმ პირზე (ან მის კანონიერ წარმომადგენელზე), რომელსაც ეხება დაზღვევა წინამდებარე პირობების შესაბამისად;

8.3.8. II ნაწილის სადაზღვევო დაფარვის ფარგლებში კიდურების დაკარგვისთვის ან დაზიანებისთვის გათვალისწინებული კომპენსაციის გადახდა ხორციელდება საავადმყოფოში მკურნალობის დასრულების და დაზიანების ხარისხის საბოლოო განსაზღვრის შემდეგ, მაგრამ მხოლოდ 1 წლის შემდეგ, ორგანოს ფუნქციის მოშლის მომენტიდან, იმ პირობით, რომ ამ პერიოდში დადასტურდება ორგანოს ფუნქციის სრული მუდმივი მოშლა. აღნიშნული ერთწლიანი პერიოდი არ ვრცელდება იმ შემთხვევებზე, როდესაც ორგანოს ფუნქციის სრული მუდმივი მოშლა იმთავითვე დადასტურებულია;

8.3.9. II ნაწილის სადაზღვევო დაფარვის ფარგლებში I ნაწილის დაფარვასთან, პირობებთან ერთად მოქმედებს მგზავრის უბედური შემთხვევის დაზღვევაც;

8.3.10. II ნაწილის სადაზღვევო დაფარვის ფარგლებში მზღვეველი აუნაზღაურებს შესაბამისი სადაზღვევო პოლისით გათვალისწინებულ სადაზღვევო ანაზღაურებას იმ პირს (ან მის სრულუფლებიან კანონიერ წარმომადგენელს), რომელსაც ამ პირობების მიხედვით ეხება დაზღვევა;

8.3.11. მზღვეველზე, რომელმაც გადაიხადა სადაზღვევო ანაზღაურება, გადადის ზიანის ანაზღაურების მოთხოვნის უფლება მიყენებულ ზიანზე პასუხისმგებელი პირის მიმართ გადახდილი ანაზღაურების სრული ოდენობის ფარგლებში. დამზღვევი ვალდებულია გადასცეს მზღვეველს მის ხელთ არსებული ყველა დოკუმენტი (მათ შორის, შესაბამისი უფლებამოსილი სახელმწიფო ორგანოების მიერ ოფიციალური ფორმით გაცემული (დამოწმებული უფლებამოსილი პირის ბეჭდითა და ხელმოწერით) სადაზღვევო შემთხვევის დამადასტურებელი დოკუმენტი, ორიგინალის სახით, სადაც აღნიშნული უნდა იყოს: შემთხვევის ადგილი და თარიღი, შემთხვევის ყველა მონაწილის ვინაობა, შემთხვევის მოხდენაზე პასუხისმგებელი პირი (პირები), აგრეთვე საქმისათვის მნიშვნელობის მქონე სხვა გარემოებები), რომელიც საჭიროა ამ მოთხოვნის რეალიზაციისათვის;

8.3.12. თუ სადაზღვევო ანაზღაურების მომენტისათვის დამზღვევს ერიცხება დავალიანება, ანაზღაურების თანხიდან გამოქვითოს შესაბამის დავალიანების თანხა;

8.3.13. სადაზღვევო ანაზღაურების გაცემით მზღვეველი თავისუფლდება დამზღვევის წინაშე მასზე დაკისრებული ვალდებულებისაგან გადახდილი თანხის ფარგლებში.

წინამდებარე შეთავაზება წარმოადგენს არაამომწურავ ინფორმაციას დაზღვევის პირობების შესახებ და აღნიშნული დოკუმენტი არ არის დაზღვევის ხელშეკრულების იდენტური ძალის მქონე.

თქვენს მიერ წინამდებარე შეთავაზების გაცნობა და ჩვენს მიერ შეთავაზებასთან დაკავშირებით განმარტებების გაკეთება არ წარმოშობს სამართლებრივ შედეგებს და მოთხოვნებს თქვენსა და ჩვენს შორის.